

Titre

**Mir brauchen eng Renaissance vun eisem
Programm de Politique Architecturale**

Announce

**Méi wie jeemools brauche mir gemeinsam Ziler, Valeuren a besonnesch
d'Vertrauen an d'objektiivt Wësse vun onofhängege Fachleit.**

Vum **Pierre HURT**, directeur de l'Ordre des Architectes et des Ingénieurs-Conseils

(oai.lu)

Texte

**Mir brauchen eng Renaissance vun eisem Programm de Politique
Architecturale ⁽¹⁾**

De 14. Guide OAI Références, dee viru kuerzem publizéiert gouf, dokumentéiert ganz gutt
déi aktuell Dynamik am Bau hei zu Lëtzebuerg.

D'Architekten, d'Ingénieurs-Conseils, an déi aner OAI-Beruffer (d'Urbanisten, d'Architekten
d'intérieur an d'Architekt- /Ingénieur-Paysagisten), weisen do hir multipel a kreativ Léisunge
fir eise Cadre de vie.

Mee et feelt heiansdo nach u Kohärenz, Kontextualitéit, a besonnesch klore Prioritéiten a
Valeuren di vun allen Acteure gedeelt ginn, fir dat mir di akut Krisen – Klima, Wunnen –
besser a schnell kënnen ugoen.

Dofir plädéiert den OAI fir e Revival oder besser nach e Neischreiwe vum Programm de
Politique Architecturale, deen 2004 vun der ganzer Regierung ënnerschriwwen gouf, mat 14
prezisen Demarchen. Munches ass ëmgesat ginn, Villes muss nach kommen.

Dat Dokument war d'Resultat vun engem kooperative Prozess vun de Ministèren an Administratioune mat allen Acteuren um Bau (Konzepteuren, Handwierker an Entrepreneuren...).

Grad elo ass et wichteg dëse Prozess fundamental nei ze denken, nodeems d'Covidkris ons existenziell Problemer kloer opgedeckt huet. An och no der COP26 vu Glasgow, souwéi dem EU-Programm New European Bauhaus.

Dat wieren e resilient Funktionéiere vun eisem Cadre de Vie op sozialer, ekologescher an ekonomescher Basis, a besonnesch eng echt a couragéis Baukultur wou mir gemeinsam Liewensqualitéit deelen.

Awer mir dierfen eis net mat onnëtz Reegelen iwwerfrachten, an och net nach dee klengste Risiko zu 100% juristesch ofdecken.

De Mut, d'Loscht zum kreativen Agéiere muss bleiwen.

Elo endlech eng reell an intelligent administrativ Simplificatioun, an e schlaue Code de la Construction koherent mat kloer Prioritéite fir dat et um Terrain viru geet.

Lëtzebuerg soll weider Virreider sinn, nom Moto : Design first, build smart.

Méi wie jeemools brauche mir gemeinsam Ziler, Valeuren a besonnesch d'Vetrauen an d'objektivt Wësse vun onofhängege Fachleit op allen Niveauen. Deene mussen mir och an aller Transparenz d'Moyene ginn, fir hir wichteg Missioun ze erfëllen.

Well di aktuell Vertrauenskris a wëssenschaftlech Fakten ass ganz geféierlech fir eist friddlecht Zesummeliewen.

Net nëmmen aus akuter Angscht mee mat klorem an opgekläertem Kapp solle mir solidaresch sinn an och esou handeln.

Pierre Hurt

⁽¹⁾ Le programme de politique architecturale, approuvé par le Conseil du gouvernement le 11 juin 2004, peut être consulté dans la Médiathèque du site www.oai.lu.